

habet à capite & corde Christo, atq; à sancto corpore Christi.

Recedunt autem ab Ecclesia omnes hæretici, qui non seruant fidem & dogmata Ecclesiæ, qui scripturis sanctis de Christo & Ecclesia non credunt.

Nostri aduersarii recte dicunt, Qui recedit ab Ecclesia, est publicanus & Ethnicus, non est Christianus, sed hæreticus, & nisi in gremium sanctæ matris Ecclesiæ redierit, damnatur. Redit autem per fidem doctrinæ sanæ, hucusq; consentimus. At hoc controuertitur, quis recedat ab Ecclesia, & quid sit Ecclesia.

Ecclesia est societas ac congregatio Christifidelium in spiritu, quæ Euangelio Ihesu Christi credit. Ergo qui Euangelio Christi non credit, sed Ecclesiæ dogmata recta impugnat, nec sentit de fidei articulis, quod sancta & uniuersa per orbem sentit & credit Ecclesia, ille ab Ecclesia recessit, & se à corpore mystico præscidit.

Dogmata Ecclesiæ sunt, quæ Ecclesia catholica non ex cerebro humano, sed ex uerbo Dei didicit, & hastenus concorditer & synceriter custodiuit.